



Aqqalu C. Jerimiassen
Atassut

UKA 2021/159
14. oktober 2021

Uunga siunnersuut: Kalaallit Nunaata MARPOL-imut isumaqatigiisummi Ilanngussaq VI-mut atatillugu nunap immikkoortuatut tunuarsimaarfigineqarneranik Namminersorlutik Oqartussat atorunnaarsitsinissaat pillugu Inatsisartut aalajangiiffigisassaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

MARPOL-imi isumaqatigiisummi Ilanngussaq VI-mut ilanngunnissaq nunarsuarmioqataasutut akisussaaqataanermik takutitsinerussaaq.

Ikummatissarmi annertuallaaq umiarsuarnit angisuunit, takornariartaataagunik containerersuutaagunilluunniit imartatsigoortunit aniatinneqartareersimasoq maannangaaq iliuuseqaqataaffigiinnartariaqarparput.

Soorlumi 1970-ikkut 80-ikkullu ingerlaneranni annertuupilussuarmik Freon sammineqarnikuusoq, taanna nillartaatsivinnut assigisaanullu annertuumik atorneqartarnikuusoq ozonlagerimut silaannarsuatsinni annertuumik nungullartitsileraluarsimavoq. Taamaattorli 1987-imi aggustimi Montreal protocol pilersinneqareernerani iliuuseqartoqarallartillugu suli ullumikkumut seqernup qinngornerinut ulorianartunut aqqusaarneqarsinnaanerigaluarput pinngitsoortinneqarsinnaalersimalluni.

Taamaattumik isumaqatigiisutit taamak ittut nunarsuarmioqataanermut akisussaassuseqarpalaartumik iliuuseqarnerinnaapput, tassuunakkullu MARPOL-imi isumaqatigiisummi Ilanngussaq VI-muttaaq ilanngunnitsigut akisussaaqataanerput kingumut naqissuseqqissavarput.

Imartarpummi inuiaqatigiittut ingerlanitsinni nappatitta avammullu tunisassiornitta pingaarnersaraat, innarlertuarneratigullu inuiaqatigiittut uummatitsitut taasinnaasarput ajutumeerluinnarsinnaammagu.

MARPOL-imi Ilanngussat I-imiik aallartittut 1983-imiilli nunarsuatsinnut annertuumik iluaqutaasimapput, 2005-imilu Ilanngussaq VI-imut killinneranni suli akisussaassuseqarnerusumik imaani angallannikkut periuseqarnissamut tikkuussisoqarsimanerani nunatta ilaaqqunnissaa pissusissamisuuinnartutut taaneqarsinnaalluni.

Taamatut oqaaseqarluta Atassummiit siunnersuut Eqqissisimatitsinermut Avatangiisinullu Ataatsimiitsitaliamut innersuupparput.